

Pembangkang dicabar nyata pendirian LGBT

Jaringan Melayu Malaysia bimbang kes nikah sejenis

Oleh Mohd Nasaruddin Parzi
mnasaruddin@bharian.com.my

KUALA LUMPUR: Jaringan Melayu Malaysia (JMM) mendesak tokoh politik daripada pakatan pembangkang tampil menjelaskan pendirian sama ada wujud ajaran agama yang menggalakkan budaya perkahwinan sejenis.

Pengarah Kebangsaan JMM, Noraini Abd Khalil Saferi, berkata ini berikutan ada sebilangan tokoh politik daripada pembangkang sebelum ini pernah memperjuangkan dan mempromosikan program Seksualiti Merdeka.

Malah, katanya, pelaksanaannya itu juga kononnya sebagai menghormati hak asasi golongan tertentu termasuk kumpulan Lesbian, Gay, Biseksual dan Transgender (LGBT).

“Kita mahu penjelasan daripada tokoh pakatan pembangkang sama ada isu hak asasi manusia lebih penting daripada undang-undang ciptaan Tuhan serta ajaran agama.

“Kita juga mahu tahu, sama ada program Seksualiti Merdeka adalah satu agenda pembangkang secara ‘langsung’ untuk memperjuangkan supaya seorang biseksual boleh menjadi PM (Perdana Menteri) atau ketua pembangkang?” ka-

tanya dalam satu kenyataan di sini, semalam.

April lalu, JMM bersama 18 badan bukan kerajaan (NGO) antaranya, Waris Malaya, Aman Kampus, Alumni Aspirasi, Gabungan Pelajar Melayu Semenanjung (GPMS) mengadakan perhimpunan aman menolak amalan seks bebas dan LGBT yang semakin menular di negara ini.

Program diadakan di Universiti Putra Malaysia (UPM) itu turut dihadiri lebih 3,000 peserta termasuk pelajar dari lapan institusi pengajian tinggi (IPT).

Dalam pada itu, baru-baru ini, Noraini turut mendesak Presiden



Noraini

PKR, Datuk Seri Dr Wan Azizah Wan Ismail mengadakan sidang media bersama Shamsidar Taharin bagi menjawab dakwaan suaminya mempunyai hubungan sulit dengan isteri Timbalan Presiden, Azmin Ali.

Noraini berkata, penjelasan seperti itu perlu bagi memastikan semua rakyat negara ini tahu mengenai pendirian mereka berhubung isu berkenaan.